

**ՊԱՅՄԱՆԱԳԻՐ N 1**  
**ԴՐԱՄԱՇՆՈՐ Հ ՏՐԱՄԱԴՐԵԼՈՒ ՄԱՍԻՆ**

ք. Երևան

«29» 01 2024 թ.

Հայաստանի Հանրապետության կրթության, գիտության, մշակույթի և սպորտի նախարարությունը (այսուհետ՝ Պետական մարմին), ի դեմս գլխավոր քարտուղար Հասմիկ Հակոբյանի, որը գործում է Պետական մարմնի կանոնադրության հիման վրա, մի կողմից, և «Բնակարան երիտասարդներին» վերաֆինանսավորում իրականացնող վարկային կազմակերպություն փակ բաժնետիրական ընկերությունը (այսուհետ՝ Ընկերություն), ի դեմս Ընկերության գործադիր տնօրեն Տիգրան Միրզոյանի, որը գործում է Ընկերության կանոնադրության հիման վրա, մյուս կողմից, (այսուհետ միասին՝ Կողմեր), հիմք ընդունելով ՀՀ կառավարության 2023 թվականի դեկտեմբերի 28-ի «Հայաստանի Հանրապետության 2024 թվականի պետական բյուջեի կատարումն ապահովող միջոցառումների մասին» N 2323-Ն որոշումը (այսուհետ՝ Որոշում), ինչպես նաև 2024 թվականի հունվարի 18-ին կողմերի միջև կնքված N 1 փոխըմբռնման հուշագիրը, կնքեցին սույն պայմանագիրը (այսուհետ՝ Պայմանագիր) հետևյալի մասին.

**1. ՊԱՅՄԱՆԱԳՐԻ ԱՌԱՐԿԱՆ**

1.1. Սույն Պայմանագրով սահմանվում է «Հայաստանի Հանրապետության 2024 թվականի պետական բյուջեի մասին» ՀՀ օրենքի «1115. Երիտասարդության ծրագիր» ծրագրի «12001.Աջակցություն երիտասարդ ընտանիքներին» միջոցառման շրջանակներում պետական աջակցության տրամադրումը (այսուհետ՝ Ծրագիր), որի շրջանակներում Ընկերությունն իրականացնում է 2024 թվականի հունվարի 18-ին Կողմերի միջև կնքված N 1 փոխըմբռնման հուշագրով (այսուհետ՝ Հուշագիր) սահմանված սուբսիդավորման գործընթացի (այսուհետ՝ Միջոցառումներ) կազմակերպումը:

**2. ՀԻՄՆԱԿԱՆ ԴՐՈՒՅԹՆԵՐ**

2.1. 2024 թվականի Հայաստանի Հանրապետության պետական բյուջեով հատկացվող պետական աջակցության առավելագույն չափը կազմում է մինչև 2064900.0 (երկու միլիարդ վաթսուներկու միլիոն ինը հարյուր հազար) հազար դրամ:

2.2. Հատկացվող միջոցներն ուղղվում են Միջոցառումների իրականացմանը՝ համաձայն Հուշագրով սահմանված կարգի:

2.3. Պետական մարմինը 2.1-ին կետում նշված գումարը Որոշմամբ հաստատված համամասնությունների համաձայն փոխանցում է Ընկերության ՀՀ կենտրոնական բանկում բացված հատուկ հաշվին՝ Հուշագրի դրույթներին համաձայն:

**3. ՄՈՆԻԹՈՐԻՆԳ**

3.1. Պետական մարմինը Հուշագրով սահմանված կարգով կարող է իրականացնել Միջոցառումների գործընթացի մոնիթորինգ:

3.2. Պետական մարմինը կարող է, մոնիթորինգի իրականացման նպատակներից ելնելով, Ընկերությունից պահանջել Հուշագրով սահմանված հաշվետվություններ, ինչպես նաև գործառնություններ վերաբերող այլ հաշվետվություններ և փաստաթղթեր:

3.3. Պետական մարմինը ցանկացած ժամանակ կարող է նաև իրականացնել մոնիթորինգ Ընկերության տարածքում՝ նախապես Ընկերությանը ծանուցելով ժամկետների և լիազորված անձանց շրջանակի մասին:



3.4. Մոնիթորինգի իրականացման ընթացքում Ընկերությունից կարող են պահանջվել գրավոր ու բանավոր պարզաբանումներ և բացատրություններ:

3.5. Մոնիթորինգի իրականացման ընթացքում բացահայտված թերացումների ու բացթողումների շտկման նպատակով Ընկերությանը տրվում են առաջարկություններ:

#### **4. ԿՈՂՄԵՐԻ ԻՐԱՎՈՒՆՔՆԵՐԸ ԵՎ ՊԱՐՏԱՎՈՐՈՒԹՅՈՒՆՆԵՐԸ**

##### **4.1. Պետական մարմինն իրավունք ունի՝**

4.1.1. Ստուգել Ընկերության կողմից իրականացվող Հուշագրով սահմանված միջոցառումների ընթացքը և որակը՝ առանց խոչընդոտելու վերջինիս գործունեությանը,

4.1.2. Ընկերությունից պահանջել հաշվետվություններ և (կամ) լրացուցիչ տեղեկություն հեռակա ստուգման նպատակով՝ նախապես իրազեկելով Ընկերությանը դրանց ձևի և ժամկետների վերաբերյալ,

##### **4.2. Ընկերությունն իրավունք ունի՝**

4.2.1. սույն պայմանագիրը ուժի մեջ մտնելու պահից Պետական մարմնից պահանջել սույն պայմանագրի 2.1.-ին կետով սահմանված գումարը՝ համաձայն 2.3.-րդ կետով սահմանված ընթացակարգի:

##### **4.3. Պետական մարմինը պարտավոր է՝**

4.3.1. Ծրագրով նախատեսված դեպքերում աջակցել Ընկերությանը.

4.3.2. իրականացնել Ծրագրով նախատեսված այլ աշխատանքներ.

##### **4.4. Ընկերությունը պարտավոր է՝**

4.4.1. իրականացնել Ծրագրի շրջանակներում Պետական մարմնի կողմից տրամադրված գումարների պատշաճ օգտագործում՝ համաձայն Հուշագրով նախատեսված դրույթների, և ֆինանսական միջոցներն օգտագործել միայն Ծրագրի նպատակներին համաձայն,

4.4.2. կատարել Պետական մարմնի կողմից բացահայտված թերությունների վերացման նպատակով տրված ցուցումները.

4.4.3. Ծրագրի իրականացման մասին իրազեկման բոլոր հարթակների տեսանելի վայրում (ներառյալ ազդագրերը, հրավիրատոմսերը, մամուլի հրապարակումները և այլն), ինչպես նաև Ծրագրի իրականացման մասին իրազեկմանն ուղղված ցանկացած գրավոր և/կամ բանավոր խոսքում հրապարակել Պետական մարմնի անունը (որպես ֆինանսավորող կողմ), իսկ համաֆինանսավորման դեպքում՝ Պետական մարմնին տրամադրել ամբողջական տեղեկատվություն՝ ծրագրին աջակցող կազմակերպության(ների), ֆինանսավորման չափի և վերջինիս(ներիս) հետ ձեռք բերված այլ պայմանավորվածությունների մասին:

#### **5. ԱՆՀԱՂԹԱՀԱՐԵԼԻ ՈՒԺԻ ԱԶԴԵՑՈՒԹՅՈՒՆԸ (ՖՈՐՍ-ՄԱԺՈՐ)**

5.1 Պայմանագրով նախատեսված պարտավորություններն ամբողջությամբ կամ մասնակիորեն չկատարելու համար կողմերն ազատվում են պատասխանատվությունից, եթե դա եղել է անհաղթահարելի ուժի ազդեցության հետևանքով, որը ծագել է պայմանագիրը կնքելուց հետո, և որը կողմերը չէին կարող կանխատեսել կամ կանխարգելել: Այդպիսի իրավիճակներն են երկրաշարժը, ջրհեղեղը, հրդեհը, պատերազմը, ռազմական և արտակարգ դրության հայտարարումը, քաղաքական հուզումները, գործադուլները, հաղորդակցության միջոցների աշխատանքի դադարեցումը, պետական մարմինների ակտերը և այլն, որոնք անհնարին են դարձնում պայմանագրով նախատեսված պարտավորությունների կատարումը: Եթե անհաղթահարելի ուժի



ազդեցությունը շարունակվում է 3 ամսվանից ավելի, ապա կողմերից յուրաքանչյուրն իրավունք ունի լուծելու պայմանագիրը՝ դրա մասին նախապես տեղյակ պահելով մյուս կողմին:

## 6. ՊԱՅՄԱՆԱԳՐԻ ԳՈՐԾՈՂՈՒԹՅԱՆ ԺԱՄԿԵՏԸ, ՓՈՓՈԽՈՒՄԸ, ԴԱԴԱՐՈՒՄԸ ԵՎ (ԿԱՄ) ԼՈՒԾՈՒՄԸ

6.1 Պայմանագիրը և դրանից ծագող պարտավորությունները ուժի մեջ են մտնում դրա կնքման պահից, գործում է մինչև 2024 թվականի դեկտեմբերի 31-ը ներառյալ և դրա գործողությունը տարածվում է 2024 թվականի հունվարի 1-ից ծագած հարաբերությունների վրա: Պայմանագիրը գործում է մինչև պարտավորությունների ամբողջ ծավալով կատարումը:

6.2 Պայմանագրի փոփոխումը և (կամ) լրացումը կատարվում է Կողմերի համաձայնությամբ՝ լրացուցիչ համաձայնագրով, որը Պայմանագրի անբաժանելի մասն է:

6.3 Պայմանագիրը դադարեցվում և (կամ) լուծվում է Հայաստանի Հանրապետության օրենսդրությամբ սահմանված կարգով:

## 7. ԱՅԼ ՊԱՅՄԱՆՆԵՐ

7.1 Պայմանագրում ցանկացած փոփոխություն և (կամ) լրացում կատարվում է գրավոր:

7.2 Պայմանագիրը կազմված է հայերեն, երկու հավասարազոր իրավաբանական ուժ ունեցող օրինակից: Յուրաքանչյուր կողմին տրվում է մեկական օրինակ:

7.3 Պայմանագրով Կողմերն իրենց պարտավորությունները չկատարելու կամ ոչ պատշաճ կատարելու համար պատասխանատվություն են կրում Հայաստանի Հանրապետության օրենսդրությամբ սահմանված կարգով:


## ԿՈՂՄԵՐԻ ԻՐԱՎԱԲԱՆԱԿԱՆ ՏՎՅԱԼՆԵՐԸ ԵՎ ԱՏՈՐԱԳՐՈՒԹՅՈՒՆՆԵՐԸ

### Նախարարություն

ՀՀ կրթության, գիտության, մշակույթի և սպորտի նախարարություն ՀՀ, ք. Երևան, Վազգեն Սարգսյան 3, Կառավարական տուն 2

ՀՀ ՖՆ գործառնական վարչություն  
Հ/Հ900011032720  
ՀՎՀՀ 02698732

Գլխավոր քարտուղար՝


  
Հասմիկ Հակոբյան



### Ընկերություն

«Բնակարան երիտասարդներին» ՎՎԿ ՓԲԸ  
ՀՀ, ք. Երևան, Հանրապետության 22/13  
Հ/Հ 103007001706  
ՀՎՀՀ 02708397

Գործադիր տնօրեն՝

  
Տիգրան Միրզոյան

